

Communicaziun allas medias digl cumegn da Surses (nr. 8-2021)

Surses: la construcziun dalla tgesa da scola nova vign planisada agl li existent a Savognin

Cun clera maioritad ò la radunanza communal decidia da planisar la nova tgesa da scola primara aint igl li existent a Grava, Savognin. Igl madem mument è la suprastanza communal neida incumbensada da lascher elaborar igl project da detagl per igl bietg nov. Pinavant ò la radunanza communal er approvo la revisiun parziala dalla lescha da votaziuns e d'elecziuns digl cumegn da Surses e la revisiun parziala dalla lescha da biagier digl anteriour cumegn da Savognin. Ultra da chegl ò igl suveran concedia dus credits e decidia da dar an dretg da biagier ena parcella da biagier per la construcziun d'ena tgesa d'abitar scu er da vender taragn ainten la zona d'industrieia Gravas a Cunter.

La tgesa da scola primara duess restar aint igl li existent a Grava, Savognin. Igl bietg existent vign pero sbuo per biagier ena tgesa da scola nova, tgi corresponda agls basigns d'ena scola moderna. Chegl ò la radunanza communal decidia cun clera maioritad. An discussiun è er sto en li alternativ a Savognin, numnadamaintg aint igl quartier Bursa. Perveia dalla furma da parcella manc optimala ed igl fatg tgi la surfatscha basignevla è betg anc ainten la zona conforma per realisar igl project, ò chella varianta betg catto ena maioritad. En oter aspect per la decisiun è er stos igls costs considerablamaintg pi ots tgi tar la varianta da construeir ena scola nova a Grava ed igl fatg tg'ins vess gia da far ulteriouras investiziuns per saveir nizigier la tgesa da scola actuala per en oter scopo. L'evaluaziun cun stema da costs approximativa digls dus lis per la scola è neida fatga digl biro Anaïs Architektur da Turitg.

La radunanza communal ò angal gia da decider davart igl li futur per la tgesa da scola primara. Ossa stò la suprastanza communal elaborar igl project da detagl.

La tgesa da scola existenta è neida biageida igl onn 1954 e corresponda betg ple agls basigns d'ozande.

Revisiun parziala dalla lescha da votaziuns e d'elecziuns digl cumegn da Surses

Sainza discussiun ò la radunanza communal approvo la revisiun parziala dalla lescha da votaziuns e d'elecziuns digl cumegn da Surses. Cun chella revisiun vign introduceida l'elecziun digls commembers da suprastanza an etappas cun en turnus da mintgamai dus onns. La midada vign fatga per evitar tgi tots quatter commembers da suprastanza demissiuneschan igl madem taimp u vignan betg ple eligias, cun la consequenza tgi la cuntinuitad e saveida necessaria digl gremi na fiss betg garanteida. La revisiun parziala aintra an vigour cun l'approvaziun dalla radunanza communal. Chegl ò la consequenza tgi ainten la sagonda mesadad digl onn ò da neir fatga l'elecziun per dus commembers da suprastanza.

Revisiun parziala dalla lescha da biagier digl anteriour cumegn da Savognin

La radunanza communal ò approvo sainza cuntervusch la revisiun parziala digl art. 20 alinea 1 (zona digl center) dalla lescha da biagier digl anteriour cumegn da Savognin. Cun chella midada ègl pussebel da realisar ainten la zona digl center a Savognin - ultra dalla part da surfatschas d'abitar - da nov er menaschis da sarvetsch tgi disturban betg. Igl adiever da sarvetsch ainten la zona digl center corresponda veaple agl basigns d'ozande. Ossa ò da neir fatg l'exposiziun da recurs e siva lezza procedura ò la regenza grischuna d'approvar la revisiun parziala an tavla.

Credit per la realisaziun d'en pumptrack

La radunanza communalà ò concedia en credit d'impegn brut da fr. 350'000.00 per la realisaziun d'en pumptrack incl. en areal da skate ed en kidstrack, sen ena surfatscha da circa 1'730 m² aint igl conturn digl Lai Barnagn a Savognin. Igl taragn è an possess digl cumegn da Surses e sa catta ainten la zona per edifezis e stabiliments publics. Igl project vign realisò digl cumegn cun sustign dall'Uniun Pumptrack Surses, tgi gida er tar la finanziaziun digl project cun tschartger sponsours e cun atgnas prestaziuns da labour. Igl project vign realisò an dus etappas. Las lavours scumainzan la fegn da stad e vignan terminadas prubablamentg la premaveira 2022.

Vendita da dus parcelas ainten la zona d'industria Gravas a Cunter

Sainza discussiun ò la radunanza communalà do suatientscha alla dumonda dalla Stieger Bedachungen und Spenglerei GmbH e dalla Thomann Landmaschinen Metallbau SA da pudeir cumprar mintgamai la parcella ainten la zona d'industria Gravas a Cunter, tgi las dus societads vevan anfignen ossa an dretg da biagier digl cumegn.

Ulteriouras decisiuns

La radunanza communalà ò er concedia en credit supplementar da radond fr. 84'000.00 per lavours supplementaras an connex cun igl bietg provisoric per la scola primara a Savognin. Igl suveran ò er do suatientscha alla dumonda d'en pêr marido da conceder en dretg da biagier per ena surfatscha da 838 m² giu d'ena parcella da biagier an possess digl cumegn da Surses a Badogna, Cunter, per biagier ena tgesa d'abitar. Chel taragn sa catta ainten ena zona per promover la construcziun d'abitaziuns per persungas tgi peglian domicil ainten la vischnanca da Cunter.

Alla radunanza communalà èn stos preschaints 149 votants e votantas.

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 11 da matg 2021